



partii naleraq

UPA2017/165

Kalaallit Nunaanni inatsisinik atuutsitsinermut tunngasut Danmarkimisut pitsaassuseqalernissaat qulakkeerniarlugu qanoq siuarsarneqarnissaannut apeqquteqaat aallaavigalugu oqalinnissamut siunnersuut.

(Inatsisartunut ilaasortaq Debora Kleist, Inuit Ataqatigiit)

Siullermik apeqquteqaat aallaavigalugu oqallisissiamik siunnersuuteqartoq Debora Kleist, Inuit Ataqatigiit qutsavigerusupparput, imatullu oqalliseqataaffigerusullugu:

Nunarput Naalagaaffingornissaminut piareersaleruttoq, Isumalioqatigiissitarlu sulilluni aallarereerluni, ukiullu tulliuuttut marluk – pingasut suliaqartussaasoq tamatta ilisimalereerparput. Tamanna iluatsillugu kaammattorusunnarpoq Isumalioqatigiissitap tunngaviusumik inatsisissatsinni qulakkeerniassagaa inatsisit timitaliisarnerillu imminnut naapertuuttuunissaat (de juri aamma de facto ataqatigiinnissaat)

Taamatut aallarneriarluta oqalissaarisup ujartugai paasisinnaasoraagut, aammalu Namminersornerulernittali eqqunneqarnerani aaqqitassaq malunnartuaannarnikuusoq uagut tungitsinniit nalilertariaqarsoraarput. Danskit nunatsinnut akisussaaffeqarnera qangarsuaaniilli immeraassutaannaavoq aatsaallu namminneq iluaqutissartaqaleraangat aalaniapallattarlutik, aamma uani eqqartukkami taamaappoq. Aali Namminersorneq pillugu isumaliutissiisummi issuarneqartutuut ima allaqasoqaraluartoq:

“Namminersorlutik oqartussat suliassaqarfimmik tigusinissaaasa tungaannut naalagaaffiup ingerlaannartumik Kalaallit Nunanni suliassaqarfimmi pineqartumi pitsaassuseq Danmarkimi pitsaassutsimut naleqquttoq taamallaalli Kalaallit Nunanni pissutsinik tunngavilerneqarsinnaasunik immikkut allaassutilik qulakkiissagaa.”

Tamanna nunatsinni malunnarsimangilaq, atuuttussaasimangilaq, taamaattumillu aamma isumaqarpugut danskit “naalagaaffeqatiginiartillugit “ sumiginnaajuaannarnerat tunngavigalugu tamakku inuiaat allat naatsorsuutigiunnaarlugit, tassuunalu immitsinnut pakatseqattaarunnaarluta, tuavioernerpaamik akisussaaffiit nunatsinnut tunngasut tamaasa nammineq ingerlattariaqalerigut.

Nukiit atulussiinnarnagit tunngaviusumik inatsisiliornermi isumalioqatigiissitap sulinerani kaammattorluaannartigit tamakku ilanngullugit sukumiisumik isumalioqatigiissitami suliariumaaraat.

Taama naatsumik oqalinnissamik siunnersuut oqaaseqarfigaarput isumalioqatigiissitallu aallartilluareernikup sulilluarnissaanik kissaallugu.

Qujanaq

Per Rosing-Petersen